



TAPAK 9

Kapil Mishra-i lumia
lungkak aitba anenogo



TAPAK 7

Shakira-i la kensep tasenba
May 26 nü sayatsü

VOL. XIV NO. 207 (ADOK 207)

DIMAPUR

TUESDAY

MAY 16, 2017

5.00

Nagaland Angh-i Assembly Special Session ayonger

Dimapur, May 15 (TYO): ayonger, ta osang metetdaksü. Nagaland Angh, P.B. Acharya-i May Special Session ji anepdang 27, 2017 nü 12 buba Nagaland Legislative Assembly indang 9:30 ako nungi Assembly Hall, Sixteenth (Special) Session alitsü Kohima nung alitsü, ta Angh-isa metetdaksü.

Dimapur nung nisung ka khaset

Dimapur, May 15 (TYO): angazüker saka iba osangji Hombar antügang 12:00 ako meta New Dhansiri bridge, Dimapur anasa nisung ka khaset. Tasüsangji Vivito Zhimomi ta jangjaogo aser pa ya Thungsai Kham'er jabaso aser 4th Mile, Dimapur nung telidak liasü.

Vivito aser pa khasetsang tena külemi angu aser iba sülen khasetsangji tetsüng agi asema oya angu ta osang angazükogo. Iba tatalokba atema bushisügang ka tenzükogo, ta Dimapur Police sangdong nungsa shia lir.

Vivito dak tekolak nung injang khaloktsüba zübo liasü. Pa ya Naga Yimten telok ka nung züngsem liasü ta jembiba

Higher education department-i tesayur 100 shimtsü: Deo Nukhu



May 15, 2017 nü Parliamentary Secretary, Deo Nukhu-i pa indang chamber nung osangbener den sensaksem dang agiba noksa angur.

tebilemba ka shidangogo.

Higher & Technical Education Parliamentary Secretary, Deo Nukhu-i ashiba agi, Centre sorkari State indang budget nung higher education sector atema ishiba agia shilem 5 lezmükja lir.

Ajisüaka, Nagaland nung sen lezmüktsüba State indang budget nung shilem ka ang matonger. Yaküm State Budget nung Higher Education Department nem 0.06% dang lezmüktsü aser iba jagi Department meperir, ta paisa ashi.

College tem nung tesayurtem peria meliaka, senotsü peria manguba ajanga State sorkari tesayur mapa tasen adoktsü memelar. Ajisüaka, department-i subject balala nung tesayurtem mapa tasen adoktsü atema tebilemba shidangogo, ta Deo-isa ashi.

(Maneni tapak 11 nung...)

Kohima, May 15 (TYO): Nagaland nung aliba sorkar college tem nung tesayur aser associate professor tem peria maliba atema Higher Education Department-i tesayur mapa tasen 100 dak tema adoktsü atema

Naga yimten tebilemtsü lemtettsü atema inyaker: Imkong L Imchen



Hombarnü Secretariat nung Minister Imkong L. Imchen-i pa indang chamber nung osangbener den sensaksem dang agiba noksa angur.

Kohima, May 15 (TYO): Naga telungpur telok ajaki longjemer India sorkar den Naga yimten tebilemtsü tekaratiba nung lemtettsü atema Nagaland sorkari nangzükba ama mapa

inyaker, ta Forest, Environment & Climate Change Minister, Imkong L Imchen-i ashi.

State Civil Secretariat nung Hombarnü osangbener den sensaksem dang Imkong L Imchen-i India sorkar aser NSCN(IM) tsüngda Framework Agreement agiba atema tenüngsang agütsü. "India sorkari Naga telungpur telok ajak den olemtep alitsü memulungtsü akok, anungji Naga yimten tebilemtsü atema telemtetba ka agitsü atema Naga nung ajak longjemtsüla" ta pai ashi.

Indo-Naga yimten olemtep nung yariteper ka ama Chief Minister, Dr Shurhozelie Liezietsu lenisüba kübok sorkari Political Affairs Mission (PAM) ka tentetogo, ta paisa shisem.

State Cabinet Committee on PAM-i April 8, 2017 nü

Chumukedima, Dimapur nung NSCN(K) dak alia Naga telungpur telok pungu den olemtep liogo aser kobi melii NSCN(IM) den ajurutepe olemteptsü, ta Imkong L Imchen-isa osangbener dang ashi.

Tesüüba küm ana jungnüa Naga nungertemi Framework Agreement dak sendakba onüktem jembiyonga arur. Naga nung tarutsü atema Framework Agreement ji tongtipang ta bilemba agi nisungtemi pei tangatbatem lemsateper aser ibaji tim dang.

Ajisüaka, Naga yimten tebilemtsü asoshi telemtetba ka agitsü atema olemtep aliba teloktem aser state nung yimtenren teloktem dena Naga public tsüngda angateteptsü nüngdaker, ta paisa shisem.

(Maneni tapak 11 nung...)

AICC-i Northeast state 3 atema Minority Observer shim

New Delhi, May 15 (Agencies): Northeast state asem- Assam, Arunachal Pradesh aser Manipur nung tamakok anguba sülen All India Congress Committee(AICC)-i election agitsü aliba state asem nung takok angutsü atema alizüng yur mapa inyaker.

Northeast kübok Meghalaya, Nagaland aser Mizoram nung sangküm assembly elections agitsü lir aser iba atema AICC-i minority observer shimogo.

Taruba elections nung takok angutsü atema Congress nung minority wing-i tongti shilem agitsü, ta party osang ka ajanga metetdaksü.

All India Congress Committee (AICC) nung Minority

Department-i Meghalaya, Nagaland, aser Mizoram state tem nung aliba AICC Minority Department Observer inyaksü atema Assam nungi Rejaul Karim Laskar shimogo.

"Laskar-i state asem nung minority department tem den yariteptsü. Sangküm state asem nung assembly elections asoshi nendaka inyaksü atema pai minority department tem den shisa lemsateptsü" ta party osang ajangasa shisem.

Laskar ya Assam Pradesh Congress Committee (APCC) nung taoba Spokesperson aser AICC Vichar Vibhag nunga taoba Secretary lir. All India Congress Committee nung Minority Department ajanga nübo agi

tangar memenepertem (Christians, Muslims, Sikhs, Buddhist, Jains & Parsis) dak sendakba onüktem atema inyaker.

AICC Minority Department-i Observer dang state asem mapang shia semdangtsü aser Congress party state lenirtem aser minority lenirtem den amalitepa yariteptsü tetuyuba agitsüogo.

April 27, 2017 nü Laskar-i Northeast tesem nung Congress telok tashi itshitsü atema AICC Minority Department nem tapak 148 report ka agitsü.

Pai agitsüba report nung Congress Party-i Northeast kübok Minority wing nung Khristantem teimba shimoktsü atema shia lir.

Swachh Bharat Mission kübok DMC nem gari aser osettsüset aika agütsü



Hombarnü Dimapur Municipal Council office nung Dimapur Deputy Commissioner, Kesonyu Yhome, DMC CEO Atokhe Aye aser tangartemi garitem sayatsüdang agiba noksa angur.

Dimapur, May 15 (TYO): Swachh Bharat Mission scheme kübok Dimapur Municipal Council (DMC) nem gari aser osettsüset aika agütsüogo.

Swachh Bharat Mission scheme ya October 2, 2014 nü India Prime Minister-i tenzüktsü. Tanü Dimapur Deputy Commissioner, Kesonyu Yhome-

i o jembidang, merükmejutsü atema osettsüset tapu balala amshiyonga sensotem tangatetba memelenshira amajok dang asütsü, ta ashi.

Alizüng tongtettsü atema sensotemi municipal council den yariteptsü aser public-i shilem agitsüla ta Yhome-isa ashi.

Taoba DMC CEO, Atokhe Ayemi-i kanga dang bendanga agüja inyakba ajanga mapang tatsüka tsüngda DMC telongtet nung terenlok jenti bener aruogo aser iba asoshi pa nem tenüngsang agütsür, ta Deputy Commissioner-isa ashi.

Sentong nung DMC, CEO Atokhe Aye-ia, "osettsüset tapu balala bener aruba ajanga merükmejuba mapa nung tajangzük angutsü. DMC nung mapa inyakerem ajaki alizüng atongtsü atema meranga inyaksü ayongzük" ta ashi.

Dimapur nung merükmeju mapa inyaksüba DMC-i dangbo mekoktettsü, anungji

public-ia yariteptsüla, ta paisa mepishia metetdaksü.

June 5 nü World Environment Day amungba den külemi DMC-i kiyong lemsar kilen shia nem dustbin agütsütsü. Kilen shiai dustbin anana (wet & dry waste) angutsü, ta Atokhe Aye-isa ashi.

DMC-i shisaliok rejutem ajak nem dustbin alemtsü aser jila aser colony tem kübok tongtipang tesemtem nung dustbin yutsütsü, ta paisa shisem.

June ita tanabuba hopta nungi DMC kübok aliba ward shia nung jana bendentsü atema mini dipper truck yoktsü, Atokhe-isa metetdaksü.

Swachh Bharat Mission scheme kübok DMC nem dipper mini truck 12, Excavator 1, road roller 1 aser dustbin 250 agütsü.

DMHSS Governing Body-i takok angur nem tenüngsang agütsü



May 15, 2017 nü DABA town fellowship nung Dimapur Mission Higher Secondary School Governing Board züngsemtem, DABA sannükertem, kaketshirtem aser tesayurtem külemi agiba noksa angur.

Dimapur, May 15 (TYO): Tawa NBSE 2017 result sangdongba nung takok ngua school nem tenüng tajung bener arutsüba atema Dimapur Mission Higher Secondary School (DMHSS) Governing Board-i kaketshirtem nem tenüngsang agütsüba sentong ka ayongzüka agi.

Hombarnü DABA Town Fellowship nung HSLC aser HSSLC Examination 2017 nung takok angur nem tenüngsang agütsüba sentongji ayongzüka agi.

HSLC tatidang nung kaketshir 31 nungi parnok 23-i first division aser 8-i second division nung takok angur aser

küm pungu tashi atongtepa 100% pass percentage ngutet. Maneni, kaketshir 112-i HSSLC tatidang agütsüba nungi parnok 99-i takok angur.

Tanü agiba sentong nung School Governing Body-i distinction angur aser subject tesayurtem nem sempet agütsü.

"Tanü kaketshirtemi takok angubaji tetenzüker ka dang lir. Meranga azüngertemi tarutsü nungi sempet tajungba angutsü, anungji kaketshirtemi tang takok angubaji teperi ta mebilemi, tali merangtsüla" ta

Sentong nung DABA sannüker, Rev. Dr. N Tzudir-i sarasadem aser sempet angurtem rongnung Mantok Konyak-i o jembi.

"Alima nung nisung ka taküm

nung ayongayonga alitsü masü saka teinyaktsü mapa agi sünga lir. Asenok iba lima nung ali tashi, asen taküm nung tayongzüka jenti ajurutsü aser asenoki itemji koktettsüla" ta K Temjen-isa kaketshirtem ayongzüker.

Paisa, takok anguba kaketshirtem aser tesayurtem dang school nem tenüng tajung bener arutsüba atema pelaba metetdaksü aser "telok ka külemi inyakba ajanga takok angur" ta paisa shisem.

Sentong nung DABA sannüker, Rev. Dr. N Tzudir-i sarasadem aser sempet angurtem rongnung Mantok Konyak-i o jembi.



Office of the
AO SENDEN LITERATURE BOARD (ASLB)
H.O. MOKOKCHUNG-798 601 NAGALAND,
Reg.No. HOME/SRC-6703

SANGDONGER

Ao Senden Literature Board-i achaayanga agiba Ao oshi nung Arangtet Tatidang 2017 küm atema May 18 nungi nungzüluok (Admission) tenzüksü. Tenyim (Course) balala yamai alitsü.

1. Pre-University & B Th zünger alir küm pungu, küm shia paper anana zülutsü.
2. B A, B Sc, B Com & B D zünger alir küm asem, küm shia paper asemsem zülutsü.
3. Arangtet Tatidang B A Diploma nung marks 45% tema nung pass süa alirtem Arangtet Tatidang Post Graduate Diploma atema küm ana, küm shia paper asemsem den Dissertation zülutsü. Arangtet Tatidang tenyim ajak nung paper shia Rs. 1000/- alitsü aser Dissertation zülutsü atema Rs. 3000/- balaka asütsü.

Iba nungzüluok July 20, 2017 tashi alitsü. Anungji iba Arangtet Tatidang agütsünür ajak tekübok agüja aliba Mobile Number den tongtepratepa sen Rs.50 agi Shiyim (Form) alia nungzüluoktsü sangdonger.

- | | |
|-----------------------------------|---------------------|
| 1. Kohima | : 9612800973 |
| 2. Dimapur | : 9436016084 |
| 3. Mokokchung, ASLB Office | : 9436436180 |

Sd/-
Prof. A. Lanunungsang,
Chairman.

Sd/-
I. Temjen Tzudir,
Secretary.

OFFICE OF THE
DIMAPUR AREA CHUCHUYIMLANG SENSO TELONGJEM
DIMAPUR: NAGALAND
TENÜNGSANG AGÜTSÜR



ARENMENLA



TIASANEN

Shirnoki meranga inyaker parnok den Tsüngrem adenba meteter.

1. Wb. Supongmar Jamir aser Wt. Sutsungmongla tena jala Kr. Arenmenla NPSC tatiang nung Post Graduate Teacher (Class-II Gazatted) takok angur.
2. Wb. Lanumar Pongen aser Wt. Tozunglempla tena jabaso sangpang. Tiasanen J.E. (Telecom) North East Frontier Railway. India Railway Exam nung takok angur.

Ano HSLC aser HSSLC Exam nung takok angur, nenok ajak dang Dimapur Area Chuchuyimlang Senso Telongjem-i Tenüngsang tetushi tulu agütsür.

Sd/-
I. SUNGIT,
President.

Sd/-
J. IMLI,
Secretary.

PELABA SANGDONGER

ASO : 26-6-1958 ~- ASÜ : 11-5-2017

Nübur ajaki nükshia aser nübu aginüa aliba Asür **Imlinüken** (Yaongyimsen) iba lima toktsür Kibubai jar ogo. Pa shirang yipden nung alidang nungi tasü tashi lokti balala, bendang terna den Dimapur nung aliba civil hospital aser Zion Hospital Doctor aser Nurse-tem, Yaongyimsen Senso Telongjem Dimapur, Yaongyimsen Baptist Arogo, Kosasanger Putu Menden, Senso Mongdang Yaongyimsen, Molungajem Changtongya Town, Changtongya yimtsüng, Changtongya Town, Merangkong Yimtsüng, Tuli town, Liruyim aser yimer yimsanger ajaki rongsen, nübu aser sarasadem agi yaritepa asoshi, kinunger aser anükapangi kadanga amatsü makokba tepela sangdonger.

Tsüngremi nenok taküm, kibong aser lokti ajak mojangma ta ozü sarasadem.

- Kinungtsü, chirnur, semchir, kinunger aser anükapang.

REGISTRATION
STARTS
9.30 AM

ONE DAY WORKSHOP ON
**COMPLEXITIES AND
CONTRADICTIONS OF
NEWS REPORTING**

17 MAY 2017
CAPITAL CONVENTION CENTRE
NEW SECRETARIAT COMPLEX, KOHIMA

RESOURCE PERSONS
PRADIP PHANJUBAM
DR. AKUM LONGCHARI
DZÜVINUO THEÜNUO



DEPARTMENT OF INFORMATION & PUBLIC RELATIONS
GOVERNMENT OF NAGALAND

Shilong nung Ganja sen jenjang aika alang apu



Shillong, May 15 (Agencies): Osang tejangja ka angazükba sülen, Customs Headquarters Preventive Unit, Shillong-i Punjab registration number keta aliba tata gari ka Shillong Bye Pass, Diengpasoh Toll gate nung May 13 nü Ganja kg 784 packet 51 nung temer bena aliba apu.

Iba tata gair ya apuba sülen 1985 NDPS Act kübok aija ken o ka benokogo. Ganja apuba jenjang ya sen 49,24,340 asütsü ta jangjaogo.

Iba ozüing alema shibelenba temesepba chiyongtsü ya gari

anisang tesülen miima taktang ka yanglur idakji bener liasü. Ganja ya Agartala anasa tesem ka nungi Guwahati-i bener oya lia apu. Bushisüngdang ajanga ngutetba agi, iba gari ya number plate taila ka inoker Tripura nungi mapang aben ganja shibelenba liasü. Iba gari anisang ya Assam nungi lir aser pa puogo.


Maneni iba dak sendakba nung sendak alir shibelener aser tayokertem aputsü asoshi bushisüngdang tenzükogo.

Iba mesükba ken o tanga ka

nung May 11 nü Headquarters Preventive Unit, Shillong-i sen jenjang crore 1.05 alang ganja kg 1500 Imphal nungi aruya aliba tata gari ka Silchar nung puogo. Iba dak sendakba nung gari anisangji 1985 NDPS Act kübok aija puogo aser Silchar nung okadak ken o angadangogo.

Northeast nung Manipur aser Tripura ya ganja tsünüba aser shibelenba nung tongti tesem lir aser lokti balalai lenmang balala ajanga linük ajungai iba temesepba chiyongtsü ya belenshir.

Handloom Emporium district ajak nung lapoktsü



Imphal, May 15 (Agencies): Manipur nung 'handloom' aser 'handicraft' industry ajungkettsü nükjidong nung state Commerce & Industry minister, Thongam Biswajit Singh-i tang tamshidak loom tem melena solar power loom 4000 lemtsütsü asoshi nangzük.

"Handloom aser handicraft industry jenjang ajungkettsü asoshi tangalen nungi shishilembartem jaoka asenok handloom industry nung sen indokdaksütsü nüngdaker. Südakertemi jenjang aketba oset adokdaksütetra asen

industry aintsü," ta pai ashi.

Maneni pai ashiba agi, shishilembadak sabang olushitsü nükjidong nung state aser tanga tesemtem nung tajemba agia National aser Regional level Handloom & Handicrafts Expo 10 bo ayongzuka akatsü.

"Ang tajung adokdaksütsü nükjidong nung Loitang Khunou spinning mill 'machine' tasen inoka asentenshitsu asoshi merandangdar aser iba atema textile ministry-i sen crore 33.5 indoka yanglushitsü aliba nungi subsidy shilem 70 bo agütsütsü. Handloom oset shishilembak

tesem district ajak nung yakta lapoktsü. Handloom aser Textile office tem nung inyakertem hopta nung Hombarnü aser Honibarnü traditional süoshi asemtsüla," ta paisa ashi.

Paisa ashiba agi, Murei nung ang sentsü balala nung aremtsü sayutsüba aser printing institute ka lapoktsü. Iba ajanga südakertem ang sentsü balala nung aremtsüba yimya tajungba angazüktsü. "Sorkari Handloom & Handicrafts Delivery scheme yakta tenzüktsü. Iba sentong kübok südakertem-i phone call ka dang asüba ajanga parnoki nüngdakba osettem parnok ki tonga bener arutsütsü," ta minister-i ashi.

Tangar dang nungi alaka mapa tajung inyaktetertem nem sorkari teyari balala agütsütsüba osang metetdaksüba den külemi Industrial Estate, Takyelpat nung power loom anü tashi ajanga taruba ita nungibo mapa inyak tenzüktsü, ta pai maneni shisem.



Hojai, May 15 : RSS volunteer tem deobar nikongtsütsü Hojai kübok Gitasharam tesem nung anogo 20 training agiba tatembangba sentong nung shilem agidang tangokba noksa nung angur.

KHARTSÜR TELONGJEM

MANGKOLEMBA: NAGALAND

TENÜNGSANG AGÜTSÜR

Kr. Merenmongla, Wb. Tekatemjen Walling aser Wt. Sangkawala na jala NPSC tatidang ajanga School Education Department kübok Post Graduate Teacher (Class-II Gazette) jenjang ngutetba asoshi Mangkolemba Khartsür Telongjemi tetushi agütsür. Tsüngremi maneni nü wadang moajangma.

Ano maneni 2017 küm HSLC aser HSSLC tatidang nung Khar senso aser anükapang chirnurtem kwikati takok nguogo, tenüngsang agütsür. Tarutsü nunga nenok mapa nung takok agüjang ta sarasademtsür.

Sd/-
I.Akumla Jamir
President

Sd/-
Imkongsungla
Secretary

PELABA METETDAKTSÜR

Mr & Mrs Ainla Jamir (Akhoya) Miss Kevikali (Chekeyi), Mr. Yashiwapang (Chuchuyimlang), Mr. Temjen (Chuchuyimlang) Christian Home Ministry Padumpukhuri Dimapur nungi arua Lizo Model Village (Lakhuni) Baptist Fellowship nung mapang ajak nung Tsüngrem osang tulu ajanga nüburtem tanela nung mejanga alidang sakdakja ajungmesoa Revival tulu katsüba den ano tetsütem anogo nunga sentong tajung yanglur sempetem (gift) agüja ozü fellowship sanger yariba asoshi kanga pelaba metetdaksür

Tanela'er wadang asoshi Tsüngremi nenok taküm aser sempet maneni moajang.

Sd/-
Karitoshi, Secretary,
Lizo Model Village Baptist
Fellowship.

Sd/-
Imkongnungba, Pastor
Lizo Model Village Baptist
Fellowship



Guwahati, May 15 : BJP Assam state tir Ranjeet Kumar Das, Guwahati nung Hombarnü osangbenertem den jembidang tangokba noksa nung angur.

Mizoram tsür nurse kati National Florence Nightingale Award agizük

Aizawl, May 15 (Agencies): India tir Pranab Mukherjee-i Rashrapati Bhavan nung International Nurses Day amongba nüngtem nung linük ajunga nungi nurse 35 nem Florence Nightingale Award agütsüogo.

Parnok rongnungi tiri National Florence Nightingale Award Mizoram tsür Mercy Lalpekmawii nem agütsü.

Mercy Peki ya Shri Vinoba Bhawe Civil Hospital (VBCH), Silvassa nung inyaker. Dadra & Nagar Haveli, UT tesem temüket nung specialty

mozüki, iba mozüki ya dang lir aser iba mozüki ajanga Dadra & Nagar Haveli nung aliba nütsüngtem ajak aser iba mozüki anasa aliba Gujarat o Maharashtra state tesem balala nungi nüburtem tashidak balala nokdangtsü asoshi teyari agütsüba aser anepaluba maparen ajak achayanger.

Tiri iba anogo nung award agizüker nurse tem ajak nem tenüngsang agütsüba den külemi linük nung nüburtem temang anepaluba nung parnoki tongti shilem agir ta ashi.

Minister-i lokti balala yimjung nung alitsü ajungshi

Itanagar, May 15 (Agencies): sobaliba, Kin aser lokti balala nungi adenshia yimjung nung litetbaji adianu ama litetba chichiba temaitsü lir, ta Lekang anchalik Rangali Bihu sanmilan tatembang buba sentong nung shilem agidang Arunachal PHE aser WS minister Bameng Felix-i ashi.

Moran, Ahom, Assamese, Mishng, Kosari, and Adivasi kintem mapang talangka yimjung nung külemi lia aruba

atema parnok tenüng asangba den külemi maneni yamaji liyonga aotsü asoshi pai ajungshi.

"Tashidak shilem 80 bo tzü nungi adoker. Anungji tashidak balala nungi kümzuka alitsü asoshi Arunachal meraka ayutsü nüngdaker," ta paisa ashi.

Felix-i maneni 'lavatory vehicle' eastern sector atema Namsai nung aser western sector atema Itanagar nung agütsütsü nangzük.



TIR YIMYIM

YIMOBILEM (EDITORIAL)

DIMAPUR TUESDAY, MAY 16, 2017

Nisung tali mamentsüla

Gari yanglurtemi kechi gari yangludir yangluaka nisung kwika tashi amentsüla aser khu taret seret kwishibo bendentettsü item ajakji tendanger külen government-i temelaba agütsür. Itemji gari alir aser amshirtem asoshi dang masü saka gari nung amenertem asoshia kanga tekümdangtsü temetettsütem asütsü. Item temetettsütemji shitak anidaka amshiba ajanga meteta aser memeteti gari lendongtem nungi kümzüksü. Ibayongji tetsüng ana aketba gari nungi tenzüka tetsüng aika aketba nisung amenba aser khu abenba garitem tashi repranga azüoktsü asoshi Transport Authority ajanga inyaker. Asen lima nungbo aiben scooter nunga nisung asemsem pezüzü tashia mener senzüba angur. Aji oda, auto rickshaw aser taxi garitem nunga gari anishisanga mesademtsüsa pa den mejeptepa mener senzüba angutsü. Iba amaji nübertem senzüba gari bus aser train nunga aiben tekolak tashi nung tuagi tsüngtepba mener jajaba angur. Ibaji dang masü saka ano khu abenba garitem nunga pei tashi dak alia khu talila abenba ajanga len tom nung timtem ajuruba aiben angur. Item ajakji gari yanglurtemi gari anishir aser gari nung senzürtem lendongi meidaktsütsü asoshi lateta yutsüba ashi mangai peisasa pei lendongi aitsü metsübu inyakba tamashi mapatem asütsü. Iba kasa maparen nung tang Dimapur nung auto rickshaw anirtemi government-i ashiba mangai nisung talila abentsü asoshi parnok temeten jembiba mapang lir. Ajisüaka, koba kuli agi südir süang auto rickshaw nung gari anisang den nisung asem dak tali amenbaji ozüng raksaba mapa asütsü. Koba ozüng südir süang, alima tesünep nung alitsü aser nisungtem lendong aser takoksa majurutsü atema latettsür, anungji tashi angatsüla. Atangji, sen aaba gari nung nisung talila bennüba kuliji temetet dang lir. Ibaji sen talila aanür. Aji oda, mapa inyakeritem sen talila aanübaji tajung aser tim dang, ajisüaka gari nung taküm agi tendanga sen tali aatsü merangbajibo tai dang nungi tuluba ozüng raksaba mapa ka asütsü. Sen aatsü ali aser amshir asünungji, auto rickshaw asüyonga, taxi aser bus asüyonga sen dalang meshitsüla saka tamenertem dang nungi sen dalang meshiba den ano nisunga talila bendi süra ibajibosa alimela rongsen arishiba mapa ka asütsü. Atangji, yimti ka nung auto aser taxi ama senzüba ajanga tanishirtem sen aaba dang masü saka nübertem anisüngzüker aser yimti topur jungdaktsür. Ibaji angateta, yimti nung senzüba garitem ajak temerük aser topur tajung asütsüla aser gari ashirtema awashi temetet asütsüla. Kenü India nung kaket zülur nungtugu ka Singapore-i ao. Pa yangji taxi ka nung mener senzü. Iba mapang taxi anishisangi pa nem meter nungi adokba sen dang nungi tajemba agi. Ibayongji, pai taxi anishisang dangji kechiba sen ajema agir ta süngmanga asüngdang, idangji taxi anishisang jagi langzü, 'ni iba kiyong lenmang junga memetetba agi na lenmang talangbalen nungi anir aruogo, anungji taidokang aser senji lenmang shitakbalen nungi aruba taa asütsü.' Idakji asenok tangatettsü aser tagitsü lesson tajung aika lir. Iba jagi Singapore nung taxi anishisangji makoksar saka meteta aser memeteti pai Singapore nung alirtem aser Singapore yimti topur jungdaktsür. Iba mulungjang aser iba awashiji asenok Naga nung auto, taxi aser bus anishirtem dak alitsüla. Tanübo tia majung, Dimapur nung auto rickshaw anishir teimbaka tsümartem dang lir. Ibayongji, parnoki asen lima topur ajungtsü atema kanga shishiabo mebilemer südi. Ashi, auto rickshaw ajunga ya Naga nungertemi awashi meteta amshi nungbo Naga nung aser Naga lima koda topur jungla aser Naga nung kwika ayongayonga anogo nung sen meyerijang kabo aatetla. Ibaji memetetba agi mesüra meinyaknüba agi tsümar kar ket nungbo auto rickshaw ter metsü yur, iba jagi kibong ayongayonga mesüa takar küma alir aser asenokbo mapa maka timatemer. Tanü asen lima nungbo auto rickshaw aser taxi anishirtem teimbaka tsümar aser tamenertem rongnung public-jibo yutsür police dena auto rickshaw tejaklen tanishisang den mener ozüng raksar asü, benshiar mejangja senzüba angutsü ! Asenok asoshi temelenshi nungdakba tesemji aji ka asütsü.

OLEMSABANG

"Asen pei shisatsü aser tangatetba tajung
(Indigenous Technical Knowledge, ITK)
amshia koda alu inyakyim wazüka yutettsü"

Contributed By : Mr. Bendangsenep Walling
Agriculture Officer, SDAO, Mangkolemba.

Courtesy : ATMA, Mokokchung.

(Taoba adok nungi...)

2. Tzü litre 200 nung nashi scü 20 kg mix süang aser iba sülen bosta bag ka nung iba temeyoktep ya filter süang. Ano aji sülen, tzü litre 50 nung mezüng filter sür aliba temeyoktepji enoker mix süang. Iba solution yagi tsük (tekong lu aser tzülu anaprongla nung adokba tashidak) nung adokba bacterial leaf blight ta ajaba tashitak ya control asür.
3. Tzü litre 4 aser anüksa alangsaba mamazü (papaya) tou 2 kg baltin ka nung meyokteper aonung ka yuang. Tasüngnep iba temeyoktepji filter sür drum ka nung tzü litre 50 aser 250ml sapon powder inoker meyoktepang. Iba solution amshiba yagi tsük nung adokba brown leaf spot ta ajaba tashitak ya ajema yutsür.
4. Nashi scü half kg tzü baltin half ka nung meyokteper sü ka ajanga filter suang. Iba solution amshiba ajanga tsük tashitak bacterial leaf streak ya control asür.
5. Naro, marigold ta ajaba tou-tu 10 kg agizüker drum ka nung hopta ka shi metena yuang. Iba sülen tzü litre ka iba drum nungi akitetdang aser sapon powder spoon ka enoker mix süang. Iba tatembang solution anguba yagi tekonglu aser tzülu nung adokba tashitak blast of rice ya control südaktsür.
6. Neem tou nungi agizükba totzü litre ka, tzü litre ka aser sapon tzü litre ka ajakji junga meyoktepang. Iba solution yagi tsük tekonglu aser tzülu anaprongla nung sashi adokba bacterial leaf blight aser bacterial leaf streak tashitakji control asütsü meranger.
7. Nashi indang natzü litre ka, nashi scü kg ka aser mojitsü (molasses) kg ka ya junga anüksar meyokteptsüla. Aji sülen iba temeyoktepji tzü litre pongu nung meyoktepang koba sülen tsük metsü atemtsü alibatemtu iba solution nung minute 10-15 ayutsüla. Iba solution amshiba ajanga brown leaf spot aser blast of rice da ajaba tashitakji ishiba kümdaktsür.
8. Tsük alaka tanga aonsutsütem nunga benshitettsü ITK kartem itemya asütsü.
 - * Nashi indang natzü litre 5, nashi scü 5 kg, shinü 250gm aser tzü litre 100 meyokteper aonung sangwa ka ayutsüla. Iba solution ya asenoki yamai amshitettsü- metsü, ali aser tera telak den meyokteper (used as seed, soil and seedling root tip treatment before transplanting and sowing)

Ali nung mesen tamajung aser tashitak balala aliba temtu samadaktsür koba ajanga tsünüsempongtsütem junga nursery nungi adokdaktsür.
 - * Tasen tzü 150 ml (lemon, lime etc) aser tzü litre 50 mix sür amshiba ajanga mesen shiruru aika tashitak kar kobai tsünüsempongtsütem raksatsütsü aliba nungi kumzüker.
 - * Mersü kg ka aser lusen kg ka menüngsatsüla. Iba nungi tzü alubaji litre ka agizüker tzü litre 200 nung mix sür amshiang.
 - * Haldi podwer kg ka, nashi natsü litre asem aser sapon tzü litre ka meyokteper amshiang.
 - * Lusen (garlic) junga menüngsar anogo ana yuang. Iba sülen sapon powder spoon ana akitetter baltin ka nung tzü half ka enoker lusenji tensema junga meyoktepang. Filter sür aluba tatembang solutionji amshiang.

Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agitsü mepishir

MAPANG TAJUNG ALANGZUKANG

- L. Kika Pongener, Aoyimkum, Dimapur

(Taoba adok nungi)

Ano tanabuba nung asenoki iba mapang tajung ya kechiba alangzüksüla???

Iba alima nung asenok teti alitsüba masü, tanü lir asüngbo kechi-ang ka asütsü'ar shingaia memetet, anungji asenoki tang mapang tajungbaji alangzüksüla. Tanüp aeroplane nung mener ayamesoa aeni aoba ajongbena-ka tia makai iba aeroplane-ji crash asünungbo, iba aeroplane nung mena alir ajunga kechi akümtsü???. Tanüp kidang nungi taküm tajung train nung mener aeni apusoba tia maka accident ajurua, iba train nung mena alir ajak tasüba ajurua koda asütsü???. Tanüp gari nung mener nungdak kar apusoba ajongbena accident ajurua süadokra koda...!!! Tanüp pei kidang kinunger adianu aser apuani den külemi pelatepa chiyunga-jemer office-i aoba mesüra mapa balala-i senshiba nikongdangbo tasü mang dang kidangi shilangra koda...!!!

Aji oda, asenok taküm ya tanü lir asüng malitsüba lima, aein-er lima ka nung khen amongi aruba dang.... Yob-7:6. "Kü anogo südaker süksen dang nungi tekaraba aor, aser teimla makai akümer. Asenoki asen arishi anogo talangka alitsü amai bilemer, saka südaker süksen dang nungi tekaraba odagi ta metetdi. Yob-14:1-2. "Tetsüri asoba nisung arishi tatsü, aser timtem agi sünga lir. Naro ka ama aponger aser azülaa adoker, ano aküm ka ama ajener aser meli-i akümer". Naro ka tanüp tobur junga ponga liasü, saka nikongdangbo azüla-doker, ajioda asen arishi anogo-a aji mesüka lir. Apijemtsü Shin o zülur jagi yamai ashir, "Asüng indang nü sasa mezümeküm tesü; kechiyong anogoi kechi bener arutsütsü nai memetet" (A. Shin-27:1). Dawid-i ashiba ama, "ozü arishi anogo tenem-ser metsü; mesüra arishia liaka küm lir anasü-ang ". (T. Ken-90:10). Anungji asenok taküm tajung alidang, anema alidang, kechi inyakner inyakttetsüsa tashi-ita alidang, koloni onür oteta tashi-ita alidang, asenoki Tsüngrem bushidi.

Tsüngremi mulongba ama aliba taküm aser kibong asütsü kanga tongtipang lir, kechiaser anogotem tamajung lir, aser ano anogo tamajungtemi asenok nepeta arishidagi. Asenoki asen den aliba tembar adianutem den jungtepa, longjema aser meimtepa alitsü merangdi, asenoki asen adenba lokti nung telongjem temeimtep adokdaksütsü merangdi. Alima mesüitem tashi aser alima mesama tashi loktiliba, yimden-yimli, arogotem odang alitsü, aser item lokti ajungaji kenü tashi-ita alitsü aser kenü tashimait-i alitsü, kenü kari anitsü aser kenü tangar kari melentsü. Loktilibaji raksa yongjia kenübo yanglushitsü aser longjemtsü mapangi bentsür arutsü, ajisüaka iba lokti nung nübur tsüngda telongjem meraksai wazüka ayutsü kangasa tongtipang lir. Alima nung meimchir libaliroba ya adang-melangtep amai dang lir, khen kar tema asütsü aser khen kar telung asütsü, khen kari akoktsü aser khen tangar kari takok angutsü. Anungji asenok alima nung tatsüka alidang loktiliba, kibong aser kija taküm ajunga anema aser teronem menema ayutsü kangasa tongtipang lir, aser nisung ajak den yimjung nung alitsü koda tajung aser jangratemtsü lir. Sayu-12:6. Nungji zügra sayutsüngir ken zülur jagi yamai ashir, "Taribi lisü metokdangdang, hon susa mejakrepdang, tzüpo nung tzüshi mejakrepdang, mesüra gari tsüngji meraksadang, asenoki mapang tajung alangzüka mapa tajung inyakdi. "Nü keti inyaktsü tashi alidang, shir dang tajung inyaktsü tsüa ali, parnok dang nungi sota teyu" (A. Shin-3:27).

Aji oda asenok taküm tajung alidang ajak den jungtepa pelatepa alitsübaji koda tongtipang lir. Anungji asen taküm lisü metokdangdang, asenok temang meraksadang, tashidak tamajung agi memenepdang, asen tekolok shisatsü shidak alidang, asenoki Tsüngrem bushidi. Asen taküm junga alidang Tsüngrem dangi meyipdi, aji oda mesüra süir külenbo amajok asütsü. Isaia-55:6. nungji zügra, "Kibuba ngutettsüsa alidang pa bushiang; pa anasa alidang nenoki pa dang jaang". Aji oda, asenok taküm junga alidang asenoki Tsüngrem o angashitetsüsa alidang, sarasademtetsüsa junga alidang, ken tentettsüsa junga alidang, sentepi otettsüsa tashi-ita alidang, asen tenük agi laishiba azüngtsü koka alidang, Tsüngrem bushidi. Asenoki Paul-i ashiba ama iba mapang tajungji alangzüka yudi. "Mapang tajung ajak alangzükang, kechiyong anogotem tamajung lir". Tsüngremi iba o ajanga tazüngertem ajak moajangma.

ANO GO ABEN TSÜNGREM DEN

TSÜNGREM O TABENSA LLR

"Lai shibaji Tsüngremi apuoktsüba... Tsüngrem meyong nisung tabensa, aser mapa tajung ajak jungjunga abensatsü asoshi lir" -2Tim 3: 16-17

Asen taküm nung aiben asenoki metetba, ashiba, inyaktetba, item yagi asenok kümzüksü aser abensatsü ta pei sasa temulung alemer. Saka aji khenyongi tai lir aser item jagi asenok tabensa mekümdaksür, Iba temenen lima nung tanela kümzüka alitsü asoshi asenok langka tabensaba nungdaker.

Tsüngremi Pa o asenok nem agütsüba ya, asen mulungsentsü asoshi tanelar nok ama lir. T. Pauli ashir, Lai shiaji Tsüngremi apuoktsüba aser Pa tesayubatem lir. Aser item tesayuba ajakji asenok temeshiba nung alitsü asoshi lir.

Asen taküm lenmang nung laishiba yagi koda tabensa kumdaksür? Iba yagi tesayuba nung ochi tanela indang, asen matoksaba nung tarutsü, asen tamakok jungkai adokja metongshitsür aser temeshi taküm alitsü asoshi tesayuba agütsür, Taküm ka aintsü aser tanela kümzüka alitsü, Tsüngrem o ama tabensa aser senti hadir kecha mali. Atangji, Tsüngrem o teti asen mulungjang nung zülüokdi.

SARASADEM:

KIBUBA, NÜ O AGI ONOK ABENSADAKTSÜBA ASOSHI PELAR. AMEN



Lirmen Baptist Arogo Tetsütem anogo nung Mrs. Chubalemla, Lt. J.N Aier kinungtsü aser lar chirtem arua sentong nung temoatsü ngua dena liasü. Lai Arogo aser Arogotsür nem tenla tulu agütsüba den tetsü ajak nem sempet tajung agüja moatsü. Sentong nung Mrs. Chubalai tepela O jembidang, "ni Lirmen Arogo nung 19, April 1944 temeshi kiyimba kulizüng agir yim doktsür ao. Iba sülen yimdak aiben maruteti liasü saka tanü ni küm 91 tashi arishi lia iba sentong nung tentetba asoshi kanga pelar aser Tsüngrem tenüng asanger aser nenok ajaki ni asoshi arishi meshia sarasademdaksüner" ta shia liasü. Iba ama tetsütem anogo tulu nung la aser chimurtemi tasoli Lirmen bilemteta semdangba aser mapa tajung inyakba asoshi Arogoi kanga dang pelaba lemsateper. Tsüngremi ner mapa tajung tali rena moajangma, ta Lirmen Baptist Arogo Pastor, Rev. Mar-i sangdong ka nung metetdaksü.

Theresa May-i tanur mesotettsü ta osang angashidang la tamang akangshi

London, May 15 (Agencies): British Prime Minister, Theresa May-i la tanur mabentsü ta osang metetdang temulung kanga raksa, saka la Khristan tamang ajanga ibaji koktetsüsa tashi angu ta metetdaksü.

LBC Radio nung Nick Ferrari den sensaksem dang May-i la indang taküm otsü kar lemsateper.

Lar tanur ali asübo la koma süla aser lai takümji koma ka kümla ta Nick-i asüngdangdang, "Iba telangzüba agütsütsüji tamakoktsü. Ni tanur mesotettsü ta asüba osang angashidang kanga jashi. Ajisüaka, ni ibaji koktet" ta lai ashi.

"Iba ama tia ajurubaji kü kinungbo küna dang masü, tangaria ajurur. Khuret süa bilemdang ozü kinunger tanurtem lir ta ni bilem aser khuretji angatet" ta May-isa shisem.

British Prime minister-isa la den külemi inyakertem nem tenünsang agütsü. "Parnoki parnok kibong aser mapa tsüngda mapang tiptema lemsa inyakba angudang ni kanga pelar. Ozü parliamentary züngsemtem aser cabinet purtem repringdang, parnoki pei tanur aser kibong liaka, mapa tiptema inyakba



angudang kanga pelar" ta May-isa shisem.

May aser la kinungbo Philip nati taoba hopta sensaksem ka nung tena tanur asotsü ta osangkaket ka nung adokba osangji tiyazü ta metetdakja liasü. LBC Radio den sensaksem dangsa, May-i lar tsürabur asüba indang jemi.

"Ni arishi küm 25 alidang kü tsürabur asü. Ozü kibong nung tanurji ni dang lir. Kanga dang ajungbena, kü tsürabur anaprongi ni toktsür aodang ni kanga aoksa aser temulung raksa" ta lai ashi.

"Item mapang tamajung ajurudang Tsüngremi ni yari aser ni itemji koktetsü tashi agütsü" ta Theresa May-isa metetdaksü.

Argentina nung Roman Catholic nun ka apu



Buenos Aires, May 25 (Agencies): Argentina nung tenarong tajaktem azüngba school ka nung putirtemi tanurtem dak tim mesüi kongshiba aser tashiyim amshia shi nung medemba ken o nung nun ka puogo.

Lujan de Cuyo nung aliba Antonio Provollo Institute nung putirtemi tanurtem dak mapa tamajung inyakba nung yaritep ta tai tonglokja ketdangsertemi Roman Catholic nun Kosaka Kumiko apu.

Arishi küm 42 tain Kumiko ji police-i okadak anir oa ken o ka benok saka laibo aibelen kecha masü ta ashir. Iba school nung taoba mapang kaketshir kati, putir Horacio Corbacho-i la dak tashiyim amshia shi nung medemba sülen la azü ayim dang Kumiko-i la nem diaper ka semtsü, ta osang ashiba nung ajemdaker Kumiko apu.

"Ni aibelen kecha meinyak" ta Kumiko-i okadak ketdangsertem dang ashi.

Kumiko ya Japan tsür saka la Argentina senso agia lir aser lai kaketshirtem züka merenshiba onük nunga tai tongloktsüogo.

Provollo Institute nung tanurtem dak tashiyim mapa inyakba atema yaküm putir Corbacho aser Nicola Corradi na den school nung inyaker asem- Jorge Bordon, Jose Luis Ojeda and Armando Gomez nungertem pua lir.

Parnok ya Mendoza nung aliba tepuokdak ka nung yua lir aser parnok dak tai tonglokja aliba kulitem ngutera, parnok küm 10 nungi 15 tashi tepuokdak ayutsü.

Parnok anema nisung 30 dak temai tatalokba osangtem metetdaksüogo aser itemji bushisüngdangertemi kuli bushidar.

2009 küm Antonio Provollo Institute nung aliba tanurtemi osang metetdaksüba sülen iba ken o ya temai adok aser Vatican-i bushisüngdang asütsü tetuyuba agütsü.

OLONG PAITEP # 4423

1		2				3			4	
					5		6			
		7								
8										9
			10							
11							12			
									13	
	14		15	16						
17										
						18				

TIPILEN

- 1. Kibur ka tenzüker - 5
- 5. Teronem aketba aonsotsü ka - 6
- 7. Tashi manga / tenarong maten - 6
- 11. Tanur tetsür - 4
- 12. Te _ _ _ _ ng - 4
- 15. Asüngdangba ashi - 6
- 17. Anü_ _ _ _ _ - 6
- 18. Mi jangrulok - 5

LANGTSÜNGLEN

- 2. Tanemi - 4
- 3. Te _ _ _ a - 3
- 4. Talang nung masü - 3
- 5. Tesüleni alu - 9
- 6. Süng agi chitetba aouso - 6
- 8. Angatet - 5
- 9. Tamanger lokti tentet - 5
- 10. _ _ _ _ _ temeshi - 6
- 13. Aou lanu - 4
- 14. Oshi ka - 3
- 16. Iba ya sür külen - 3

OLONG PAITEP # 4422 TELANGZÜBA

TIPILEN :

- 3. Tatem, 5. Jabaso, 6. Kotet, 8. Arr,
- 9. Ant, 11. Lungpak, 14. Pua,
- 16. Ren, 17. Mtsa, 18. Nüksak,
- 19. Ozüng.

LANGTSÜNGLEN :

- 1. Ajuru, 2. Jaja, 3. Toktep, 4. Tatsük,
- 7. Kesa, 10. Alem, 11. Leptsü,
- 12. Nüpang, 13. Temko, 15. Aika.

Noksa nung meputepi aliba tesem 8 bushiang



TANÜBO NAI LANGZÜANG


Q. India nung Tatong Tir Mohammad Hamid Ansari ya koba state nungi lir?

(Taruba adok nung onoki langzüsü)

YASHIADOK TELANGZÜBA : Arishi küm 39

NAIA YA METETER MA

Dubai Festival City nung otsü tasen ka yanglu



Dubai Festival City nung multi-media attraction 'IMAGINE' ajanga Guinness World Records otsü tasen ka yanglutetogo. Ita ishika tejakdang parnoki otsü tasen ka yangluba sülen ano maneni tasen ka yanglutet.

Dubai, UAE nung aliba mall nung shishirtem asoshi - IMAGINE - A Child's Dream ta ser sentong ka tenzük.

Iba sentong nung tayimtsü, shiruru, robot aser tanga noksatem 3-D ajanga temeket aliba kitem nung yalokja sayu.

Iba sentong nung Guinness World Records adjudicator Samer Khallouf aden aser pai tendangba sülen tayonger nem Guinness kulikaket agütsü.

Iba display ji "Largest permanent projection mapping" liasü aser iba jagi Guinness World Records otsü tasen yanglur ta pai kuli agütsü. Noksa sayuba indang tasazükji 4,857 m² (52,280.31 ft²) liasü.

Dubai Festival City-isa 'Largest water screen projection' otsü yangluteta lir.

SUDOKU # 3536

4			5	1	9				
	1				4	7	3		
8	3		7	9			2		
9	4		8			2			
7		9					4		
		2		7	1				
3						9			
	2	1		8		4			
		6		4		8	7		

TELANGZÜBA # 3535

4	6	1	2	3	5	7	8	9
3	5	8	7	9	1	6	4	2
2	9	7	6	8	4	1	5	3
6	2	4	1	5	9	3	7	8
8	7	5	3	4	2	9	1	6
1	3	9	8	7	6	4	2	5
5	4	3	9	2	7	8	6	1
9	1	2	4	6	8	5	3	7
7	8	6	5	1	3	2	9	4

OJANG LUTEP # 4028

- SSHIA : □□□□□
- AKATRI : □□□□□□
- ANMAPG : □□□□□□
- JUTANG : □□□□□□
- TMAAR : □□□□□
- KSAA : □□□□
- NOPARKI : □□□□□□□
- MNAPAG : □□□□□□
- TUNAJG : □□□□□□
- GLUTSYANÜR : □□□□□□□□□

OJANG LUTEP TELANGZÜBA # 4027

TSÜNGREM TENZÜKTSÜ NEBUJI KANGA ZÜBABO MESHIMTETER SAKA BUSHIRBO ODANG SHIMTETER

Anü ita petinu ajanga alima nung tsüngsang mopung melenshidaktsüba ama nisunger tia-a melenshidaktsür ta anü ita petinu tetzürtemi ashir, parnoki ashibaji shidak asü tai'ar nai-a na asoba ita anogo den tanü nü tia medemdangang (Horoscope):



Aries 21/3-19/4

Tasü tait aser pela alir asoshi nükjidong atongtsü kanga karar. Saka nü rongsen ajunga amshir ta metetang. Nü nükjidong atongtsü asoshi nü kisüngi inyak tajungba.




Taurus 20/4-20/5

Nai mapa meranga inyaker, saka nai inyakba mapa junga meshisadanger. Tanübo nai inyakba mapa ajunga kanga shisadanga inyaktsü aser iba ajanga nü mapa tajungba akümtsü.



Gemini 21/5-20/6

Nai tanü nü mapa nung temolung agüjang, iba ajanga mapa tembangba kisüng masü saka na azüoktsü. Tangari nü teyari nungdaktsü saka nü mapa mezüng südakjang.



Cancer 21/6-22/7

Tanü nai nür medemer aser kinungertem den mapang indokang. Iba ajanga na tepela angutsü aser tarutsü nung iba anogo menungraa bilemtettsü aser mamadoktsü.



Leo 23/7-22/8

Tanü nai mapa kar renema inyaktsü merangang. Na kong nokdaka ali, iba indang nai tali bilemer. Tangar nem tesayuba magütsü nü mapa inyaktsü merangang.



Virgo 23/8-22/9

Nai mapa kanga junga inyakteter saka tangari nü nem tutushi magütsür. Tanü nai mapa meranga inyakba tetushiji metettsü aser na pelatsü.



Libra 23/9-22/10

Nai shimba telok mesüra nai shimba mapa ajanga teraksa bener arutsü akok. Anungji tanü nai shilem agiba sentong ajunga nung kümdanga inyakang.



Scorpio 23/10-21/11

Nai mapa nung bendanga agütsür inyakba ajanga nür medemer kar temolung yirutsütsü akok. Anungji na kanga kümdanga inyaksangshiang.



Sagittarius 22/11-21/12

Nü dak sempet tajung aliba ajanga tanü na temolung ana akümtsü mapang arutsü. Nai jangraba mapa inyakang saka kanga kümdanga shimtetang.



Capricorn 22/12-19/1

Na müketa aliba kinunger aser medemer mechi nai tanü mapa meranga inyaknütsü. Kecha metsüpui lenmang sadema lapoka uang.



Aquarius 20/1-18/2

Tanü nai kija aser lokti asoshi mapa inyaktsü mapang tajung. Na asoshi tongtipang mapatem shimang aser ajemalua, bendanga agütsür inyakang.



Pisces 19/2-20/3

Mapa kar na asoshi tasak amai bilemra, mapang agia inyakang. Tangar indang taküm nung nai shilem magi tajungba asütsü.

King of the Jungle nung Johnny Depp-i shilem agitsü



Los Angeles, May 15 (Agencies): Hollywood nung nüngtugu actor Johnny Depp-i 'dark comedy King of the Jungle' nung 'cyber mogul' ka ama shilem agitsü. Arishi küm 53 tain actor-i McAfee antivirus yanglutetsang John McAfee taküm otsü nung

züluba ocet John McAfee's Last Stand nungi agizüka yanglutsü. 'King of the Jungle' film nung Wired magazine nungi bushisüngdang ka nem McAfee interview agitsü asoshi lemsütsüba angutsü. Iba interview ya anogoshi maparen ka ama dang tenzüker saka maparen tenzükyonga aodang McAfee taküm ajanga pa kanga puaba angutsü.

Depp maneni Pirates of the Caribbean: Dead Men Tell no Tales nung Captain Jack Sparrow shilem agiba angutsü. Pa ano Agatha Christie's Murder on the Orient Express aser crime drama Labyrinth nunga shilem agiba angutsü.

Depp-i shilem agiba taruba film tem rongnung The Libertine aser The Invisible Man densema lir.

Pai taruba film Fantastic Beasts aser Where to Find Them 2 nung tanaben evil wizard Gellert Grindelwald ama shilem agiba angutsü.

Shakira-i la kensep tasenba May 26 nü sayatsü

Los Angeles, May 15 (Agencies): Shakira-i la taruba kensep 'El Dorado' May 26 nü sayatsü. Arishi küm 40 tain actor iba osang Twitter ajanga lemsatop.

"Kü kensep tasenba 'El Dorado' May 26 nü kanga pelaa sangdonger! Shak #ShakiraElDorado," ta lai Twitter nung zülutsü.

Iba kensep ya 2014 küm 'Me Enamore' sayaba sülen tatongtep kensep asütsü

'Me Enamore' ken ya Billboard Hot Latin Songs, April 29 nü adoktsüba chart nung jenjang 11 buba nung maneni tawa Shakira-i 2017 Billboard Latin Music Award nung hot Latin song artist of the year ngua liasü.



Jim Parsons aser tetong-na kibong kümogo



May 15, 2017 (Agencies): Jim Parsons aser tetong Todd Spiewak-na küm 14 medema arur Honibar aonung (May 13, 2017) kibong kümogo. The Big Bang Theory nung tongti shilem agisang Jim aser tetong art director, Todd Spiewak-na ya New York nung aliba nüngtugu club aser restaurant, Rainbow Room nung kiyimba sentong agi.

'The Big Bang Theory' nung tongti shilem agisang Jim Parsons-i 2016 küm November ita pa indang Instagram nung "Iba nisung ya taoba küm 14 tejakdang tanü anogo ajuru aser ibai kü taküm nung atalokba tajungtiba liasü," ta zülur, tena indang noksa ka post sütsü.

Küm asem tajaklen Ellen DeGeneres indang show nung Jim Parsons dang Ellen-i tetong tena kibong akümtsü asoshi ajungshia liasü.


Jim Parsons ya 'The Big Bang Theory' nung tekolok techira, Sheldon Cooper tenung nung adoker. Pa chichiba taküm nunga tetsür den memedemer aser pai tebur dang meimba osang ya 2012 küm temai adoka liasü.

TAN HOPTA ATEMA - KOMA SÜLA ?

Q Nagaland nung General Election ya taküm 2017 kümisa agi nunga koma süla ?

Olong 20 shi nung May 19, 2017 tashi nung iba telangzüba ya onok dangi e-mail - tiriyim@gmail.com mesüra SMS - 9856121232 / 9436072422 mesüra Tir Yimyim Facebook account ajanga yokang. Telangzübatemji taruba Hokolbar nü adoktsütsü.

Tsüngremi molungba süra ni yimten yimsüsüba nung shilem agitsü: Rajinikanth



New Delhi, May 15(Agencies): Tsüngremi molungba süra pa yimten yimsüsüba nung shilem agitsü, ta nüngtugu actor Rajinikanth-i ashiba anogo nung BJP lenir Subramanian Swamy-i yimten yimsüsüba ren nung asayamenü o ka shia pa dang iba nungi pilaa alitsü asoshi ajungshi.

"Rajini dak tebilemdangba tejangja ka mali. Pa party aika nung dena aruogo. Rajini ya meinperonger ka dang lir," ta Swamy-i ashi.

Swamy-i CNN-News 18 den phone nung jembidang

ashiba agi, Rajinikanth ya Tamil nunger masü saka pa ya Marathi nunger Bengaluru nungi lir.

"Rajini sülen anidaker aika aliba ya pa tebilemdangba tajung ka aiba ajanga masü saka iba ya 'cult' ka lir," ta Swamy-isa ashi.

Rajinikanth-i yimten yimsüsüba ren nung adentsü pai olen ka agütsüba ya RSS ideologue, S Gurumurthy-i pelaa agizük. Pai ashiba agi, Tamil nunger nüngtugu actor-i kanga junga bilemdanger iba olen ashi saka iba ya Swamy-i magizüktet.

Swamy-i ashiba agi, Film nung shilem agirtemi o bo kanga junga jembiteter, kechiyong parnoki jembitsüba onük ajak tangar kari reneemtür.

1990's nung PV Narasimha Rao sorkar mapang pai Indian National Congress (INC) pusema liasü, aji saka Congress-i All India Anna Dravida Munnetra Kazhagam (AIADMK) den longjemtsü telemtetba agiba sülen pa Dravida Munnetra Kazhagam (DMK)-Tamil Maanila Congress (TMC) na longjemer aliba telok nung aden.

Idea Cellular ajanga parnok takoksa aluba sangdong

Mumbai, May 15 (Agencies): Mobile network agütsüba nung jenjang atsütepba rara ajanga akoksaba osang ka Idea Cellular ajanga sangdongogo aser parnoki ashiba ajanga, 2017 küm tetenzük nungi March 31 tashi nung parnok akoksaba sen crore 325.6 liasü.

Küm ka tejakdang company ajanga ita asem indang tajangzük sen crore 449.2 anguba sangdonga liasü.

Ibai Idea asoshi adonga takoksa alur asütsü aser taoba küm October ita nungi taküm April ita tashi mapang ya tamajungba lir.

Idea-i 2016 küm October-December quarter indang takoksa anguba ya mezüng sangdonga liasü aser iba mapang sen crore 383.87 takoksa angu aser taoba küm kasa mapang bo sen crore 659.35 tajangzük ngua liasü.

"India nung wireless industry nung züngsem tasen ajanga angati jembitsü aser angati data amshitsü maongka agütsüba agi

2016-17 financial year tatemlen timtem kanga agütsü. 2016 October nungi 2017 April tashi mapang dang ya 'Period of Telecom Discontinuity' ta ajatsü junger," ta Idea Cellular ajanga sangdong.

Taoba küm September ita India indang mobile shishilembadaki Reliance Jio aita jembitsü aser 4G data angati amshitsü maongka agütsü aser iba sentong ya taküm March ita tashi atsülangtsü.

Taoba küm Idea indang tajangzük sen crore 9,500.7 liasü aser 2017 küm April ita bo shilem 13.7 agi tajemba küma sen crore 8,194.5 agi tajemba akum.

2015-16 mapang tajangzük sen crore 2,174.2 liasü saka 2016-17 küm sen crore 404 agi tajemba liasü, ta Idea Cellular ajanga ashi.

Taoba küm fiscal nung Idea Cellular indang tajangzük sen crore 36,162.5 liasü saka 2016-17 küm sen crore 35,882.7 dang ajangzük.

Idea indang tang aliba

costumer mesamadaktsütsü mechi o jembiba nung taa shilem 12.5 agi tajemba kümdaktsütsüsa aküm aser taoba 2016-17 quarter nung minute ka jembiba nung sen paise 29.6 agia aliba paise 25.9-i alu. Kasa mapang data amshiba nunga megabyte shia sen paise 15.9 agia aliba nungi paise 11.5-i alu.

Reliance Jio-i angati jembitsü maongka agütsüba ajanga 'incoming call' nunga mapang timba aküm aser iba yongji Idea nungi sen indoka call asütsü aliba maongka samadaktsü, ta Idea Cellular ajanga ashir.

Anu maneni Jio nung angati amshitsü maongka atsülangtsüba ajanga mobile data amshiba nunga takoksa tali aludaktsü.

2016 küm October-December mapang Idea indang mobile data amshir million 48.6 liasü saka Jio ajanga angati maongka atsülangtsüba sülen million 42.2 dang akum.

'Non voice revenue' nung mobile data densema aazükba

Honda 'Africa Twin' motorcycle India nung sayaogo

May 15, 2017(Agencies): Honda Motorcycles & Scooters India (HMSI)-i kanga dang yongyaa aliba motorcycle 'Africa Twin' India nung jenjang sen lakh 12.9 yong sayaogo. Talinürtemi iba motorcycle ya jelia mekaa yutettsü.

Iba motorcycle ya 2016 küm Delhi Auto Expo nung sayaa liasü. 'Africa Twin' nung 998cc liquid-cooled parallel twin

engine keta lir, koba ajanga 94 horsepower aser 98 Nm torque tashi agütsür. India nung ayoktsü aliba motorcycle nung DCT transmission setup keta lir.

Iba bike ya India-i adongsar dang arutsü aser Honda indang Manesar plant nung adongteptsü.

'Africa Twin' dang ya CRF1000OL ta ajar aser iba motorcycle ya India-i 2016 küm

sayatsü asoshi imlaa liasü, saka 2016 küm June ita Japan nung menoknok agi Hamamatsu nung Honda indang plant raksatsüba ajanga atsülangtsüsa aküm. Iba ajanga alima ajunga nung 'Africa Twin' production nung kongshia liasü. Honda Africa Twin ya Triumph Tiger's 800cc range, Suzuki V-Strom aser Kawasaki Versys 1000 nunger den shishilembadak tokteptsü.

'Ransomware' Cyberattack ajanga Japan kongshiogo

May 15, 2017 (Agencies): Alima ajunga nung "ransomware" cyber attack ajanga kongshia arudar aser item rongnung Japan-a densemogo. Iba 'cyber attack' ajanga linük 150 aser tesem 600 shi nung computer aika nung kongshiogo.

Nissan Motor Co-i tanü ashiba agi, parnok indang unit tema karbo iba ajanga kongshi saka shishilembaba nung kangabo mokongshi.

Hitachi company otongdar Yuko Tainiuchi-i ashiba agi, email tem yoktsü aser file balala lapoktsü nung timtem liasü.

Parnoki ashiba agi, item timtem tem 'ransomware attack' den sendaktepa lir, aji saka senbo kecha memeshi. Iba timtem ajuruba mapang nung parnok iba timtem nokdangtsü

asoshi software install asü. Japan Computer Emergency Response Team Coordination Center ajanga 'computer attack' asüba dak sendakba nung teyari balala agütsüdar. Parnoki ashiba agi, tang tashi Japan nung tesem 600-shi nung computer 2,000 dak kongshiba metetdaktsüogo.

Iba attack dang ya "WannaCry" ta ajar aser iba ajanga kongshirtem rongnung; Britian nung mozükitem,

Germany national railway, US package delivery, FedEx, Spanish telecom company Telefonica, Europe nung gari yangludak factory tem densema lir.

Iba tebilemtsü dak sendakba nung aibelenertem aputsü asoshi alima ajunga nung bushisüngdang tenzükogo.

Comedian-Actor Vir Das-i Pakistan nung shilem agitsü akok



Mumbai, May 15 (Agencies): Comedian-actor Vir Das-i alima sema show balala ayongzüka senzüba sentong nung shilem ka ama Pakistan nung shilem agitsü akok.

Pa 2018 küm linük 26 asemtsü asoshi sentong yanglur shilem agi tenzükogo aser 'Netflix special' ajanga ashiba agi, pa sapurtem tali renlokogo. Australia nung pa show reprangtsü asoshi ticket tem jilia ajak yokmadokba ajanga sentong talila bendenloka taruba hopta shilem agitsü.

Pakistan nunger aikati Vir dangi Pakistan nung arua shilem

agitsü asoshi zülüogo. Parnok temepishiba dak ajemdaker Vir'er teloki iba sentong adalokdaktsütsü asoshi lenmangtem bushidar.

Iba indang jembidang Vir-i ashiba agi, "Kü indang 'Netflix special' nung India aser Pakistan na indanga terabo jembir. Iba onük nung asenok tsüngda mangatetep aliba ajak toktsür medemer akümtsü asoshi merangteptsüba indang jembir, aser kü onük den peta iba live show ka Pakistan nung agiba ya tembar yimtetba nung mera tasen ka asütsü. Iba sentong adaloktsü ta imlar."



LAS VEGAS, MAY 15:- 2017 May 14, Las Vegas, Nevada nung 2017 Miss USA shimba nung District of Colombia nungi Kara McCullough-i takok anguba sülen osangbener den jembiba mapang tangokba noksa nung angur.



Hombarnü Lucknow nung 17 buba UP Assembly amendang SP MLA temi U.P Angh, Ram Naik dak shidi mereploktsüdang marshal temi pa kümzükba angur. (Lucknow, May 15)

Kapil Mishra-i lumia lungkak aitba anenogo

New Delhi, May 15 (Agencies): Hombarnü Kapil Mishra-i lumia lungkak aitba anenogo aser pai asüing CBI tsüingdang Delhi Chief Minister Arvind Kejriwal-i ochimashi indang kulitem agütsüsü ta metetdaksü.

Yashi osangbener senden ka nung taoba AAP minister Mishra süchia ao aser RML hospital nung anir oa anepalu.

Kejriwal'er sorkar nung taoba Water Resources & Tourism Minister, Mishra-i osangbener senden nung AAP-i taila company tem nungi sen crore aika benden ta osang metetdaksü.

"Iba maparen ya Arvind Kejriwal-i meteta inyak, kechiyong taila company temi January 2014 nung kasa anogo aser mapang nung AAP bank account nung sen enoktsü" ta

pai kulikakettem sayua ashi.

May 6, 2017 nü Mishra ya Delhi Water Minister nungi anentsü aser iba sülen party züingsem nungia anentsü. Iba sülen pai taoba Bodbar nungi lumia lungkak aittsü tenzü.

Anogo ishika tejaklen Mishra-i, "Kejriwal-i Health Minister Satyendar Jain ket nungi sen crore 2 agütsüba ni angu" ta metetdaksa liasü.

Lanur ka gari nung alenlokba Army ketdangser tenüing asanger

Srinagar, May 15 (Agencies): April 9, 2017 nü Jammu & Kashmir kübok Budgam nung nisungtemi army dak lung agi aonba nokdangtsü atema Army ketdangser kati lanur ka jeep gari tejaklen alenloker aoba atema Army court kati ketdangser nem tenüingsang agütsüogo.

Iba tatalokba atema police-i FIR ka benok aser iba nung ajemdaker Army-i Army Court of Inquiry (COI) asütsü tetuyuba agütsü.

Iba tatalokba nung Army Major kati lung agi aonertem nokdangtsü atema jeep gari ka nung lanur ka alenloker süi.

Major Nitin Gogol-i lendongtsüdong nungi kümzüksü atema kanga dang shisa kaa iba mapa inyakba atema Court of Inquiry-i pa nem tenüingsang agütsü, ta Army osang ka ajanga metetdaksü.

Iba tatalokba ya taoba Chief Minister Omar Abdullah-i anir yimten lennir aikati aitsü.

Mumbai nung tetsür ka kibong kümer anogo 5 sülen tepset

Mumbai, May 15 (Agencies): Taoba hopta ka tsüingda Mumbai kübok tesem balala nung tetsür mang nungi shilem balala angu. Yashi tetsürla indang tekolakji Shahapur-Nashik Road anasa arem ka nung angu.

Arishi küm 24 tain Priyanka Gurav ya la kinungbo'er kibong den Worli nung liyonga aru aser

May 5 nü la sama. La samar bushitepba mapang la alidak nungi kilometer 50 shi pilar Navi Mumbai nung kilentzü yimdokdak la indang temang angu.

Priyanka tapubang nung Lord Ganesh den om noksa indang tattoo ka ajanga la maitsü jangja. Iba sülen police-i la

kinungbo den par tsüraburtem apu.

Parnoki Priyanka tepsetba aser kulitem samatsüsü merang ta tai tonglokja police-i apu aser la mang lepsar tesem balala nung endokba nung yariteper nisung ana police-isa puogo.

Priyanka ya B.Com graduate ka liasü aser la kibong kümer anogo pungu sülen sama.

GOVERNMENT OF NAGALAND DIRECTORATE OF LABOUR NEW CAPITAL COMPLEX NAGALAND :: KOHIMA

NO.LBR/TECH-391/80(Vol-III)

// Dated Kohima the 15th May' 2017

CIRCULAR

This is to inform to all Owners/Employers and Employees of all Factories, Industries, Shops, Hotels, Restaurants, Newspaper Establishments, Educational Institutions, Medical Institutions, etc., falling under the jurisdiction of Dimapur Municipal Areas and having 10 and above employees, that the Employees' State Insurance Corporation has extended the "Scheme for Promoting Registration of Employers and Employees" (SPREE) till 30th June'2017. Therefore, all concerned are informed to avail the one time opportunity of "REGISTRATION SPREE" without attracting any backlog payments/penalties during this period. Registration done after the given date will invite penalties as per the Employees' State Insurance Act, 1948.


As part of this special drive, officials of Labour Department and ESIC Dimapur Branch Office will visit the units/establishments coverable under ESI Scheme in phase-wise manner from 22nd May'2017 onwards. Therefore, all concerned are informed to cooperate and avail the special registration scheme during this period.

(Er. L. Nungshiyanger Aier)
Labour Commissioner
nagaland, Kohima

Issued by: DIPR

Molungnen O

Asü: 07-05-2017



Onoki teti meima aliba obala asür Watinungsang (Mongchen) shiranga alidang nungi pa asüba anogo tashi mangyim jashi khuret ajak nung shirnokisa nübu, rongsen, shisatsü sarasadem aser lenmang balala ajanga yaritepogo ajak dang kanga pelaba lemsateper.

Nenek mapa tajung Tsüingremi teti moajangma.

**Temeim kinungtsü, chirnur, semchisemnur,
kinungertem aser anükapang.**

Molungnen O



04.04.1944

08.05.2017

Temeim ojala **NUNGSHILEMLA LONGKUMER, Longjang**, la shiranga aliba mapang aser 08-05-2017 anogo Kibuba dangi aoba mapang tashi shirnokisa teyari balala agi onok nungita aruogo, nenok ajak dang ozü mulung taroktiba agi pelaba lemsateper. Nenek sarasadem aser mapa tajungtem ajanga ozü mulung tiptema sunepdaksür aser aria bilemba temeim tali jangjadaksür. Teyanglur Tsüingremi nenok ajak talubosa moajangma.

Ano item lokti danga pelaba shisemer :-

1. Doctors, nurses, staff aser Dialysis Unit, Zion Hospital & Research Centre, Dimapur & Woodland Nursing Home, Mokokchung
2. Longjang Baptist Arogo, Arogotsur, Youth ministry, Child ministry & Evangelical Committee.
3. Changki Baptist Arogo aser Arogotsur
4. Borlengri Ao Baptist Arogo
5. Longjang Laishir Telongjem.
6. Dimapur Longjang Senso Telongjem
7. Dimapur Longjang Tamang Sarasadem Telongjem
8. Evangelical Committee, Sumedem Fellowship, Dimapur
9. Tetsutem Telok aser kiyongertem, Firing Colony, Lengrijan.
10. Asetkong Kaketshir Telongjem Mungdang
11. Morning Shuttlers Club, Dimapur.
12. APMC, Mokokchung
13. EBRC, Kobulong
14. Longjang Jamir Kidong Telongjem
15. Longkumer Kidong, Longjang
16. Longjang 7 buba Zunga, Dimapur Unit
17. Government Middle School, Longpa
18. Baptist Mission School, Longjang
19. Lamedong Youth Association & Aningchen Youth Club, Longjang.
20. Ajemer Reko, Dimapur
21. Asangma nungi kinungertem.

**"Nuktzu yima pila-aka, tejangja kenu tepela nung
ajuruteptsü"**

- Temeim Kinungertem

PELABA SANGDONGER

2013 State General Election sullen 30 Alongtaki AC nungi **Dr. Benjongliba Aier Parliamentary Secretary CAWD & Taxes** pai ozü Akumen yim kanga dang meima yaria arudaki, aser mapa tajung aika inyakogo. Iba den Yimten, Arogo, lokti aser kija-kibong tongtipang mapa aika nung metitemi yaridar.

Tongtipangsa item mapa tajung atema ozü Akumen NPF Unit ajanga lenir Dr. Benjongliba dang pelaba neburtem den lemsateper.

1. Assam nungi Akumeni atuba lenmang nung apu (minor bridge) ka yanglutsü.
2. Yim tsüingda nung apu (minor bridge) ka yanglutsü.
3. Toilet cum generator house Sentep kima nung yanglutsü.
4. Assam nungi atuba lenmang tesadamba yanglutsü.

(M. Yohna Langu)
President
Akumen NPF Unit

(Z Medem Longkumer)
Secretary
Akumen NPF Unit

Alibaba nung mendenbuba Jack Ma ya China nung takatiba lir: Forbes



Jack Ma (File Photo)

Mumbai, May 15 Jack Ma indang rongsen ya (Agencies): E-commerce Alibaba nung mendenbuba, Jack Ma-i Wanda Group nung mendenbuba, Wang Jianlin kumogo, ta Forbes ajanga sangdong. Hokolbar anogo tashi nung

tajangzük timba aküm. Alibaba ajanga 2014 küm otsü tasen ka yangluteta alima nung 'public stock offering' tulutiba aküm. Taoba küm iba company indang stock jenjang sen \$70 liasü aser taoba Hokolbarnü New York nung iba stock jenjang sen \$120.34 liasü. Taoba küm eshika China nung takatiba jenjang nung Wang aser Jack Ma-na dang lia aru. Saka Tencent Holdings indang stock jenjang kanga kera renlokba ajanga mapang talangka melie China nung iba jenjang ya Tencent mendenbuba, Ma Huateng-i agitsü südi.


Tencent ya WeChat nung kibur lir aser Forbes ajanga Hokolbarnü pa indang rongsen ya billion \$29.9 lir, ta ashi aser Ma aser Wang-na meneptsü sen billion \$1 agi dang tajemba lir.

Tang Asia nung takatiba ya Hong Kong nungi Li Ka-shing lir aser pa indang rongsen ya sen billion \$32.9 lir, ta Forbes ajanga metetdaksü.

North Korea amokmeren masütsü asoshi Vladimir Putin-i ayongzükür

Beijing, May 15 (Agencies): North Korea-i tesüsa missile tendangba nung ya lendong lir saka Pyongyang ya tali amokmerenba ajanga tetsübu nung iba amala mapa ya inyaker, anungji yimjung alitsü asoshi linük ajungai mapa balala inyaksüla, ta Russia tir, Vladimir Putin-i Hombarnü ashi. "Nuclear tashi tuluba akümba anema asenoki telemtetba tajung ka melie nokdaker. Missile tendangba ya tangar linüki yanglua aliba missile den tokteptsü, tamajung aser lendong aketba ta züngshir. Asenoki North Korea amokmeren masütsüla aser iba tebilemsü kottetsü asoshi yimjung lenmang bushitsüla," ta Putin-i Beijing nung international forum senden ka nung dener osangbener den jembidang ashi.

North Korea-i Deobarnü tendangba missile ajanga US



Vladimir Putin

linük atongtsü, ta ashir. Iba missile ya sea level nungi kilometre 2,111.5 tashi atu aser kilometre 787 tashi orr Sea of Japan (East Sea) nung tsüka apok.

Iba missile ya meta kilometre 4,500 tashi otetsü südi, ta missile shisadanger temi

ashir. Iba missile ya Russia linük anasa tsük, ta White House-i ashir. Saka Russia indang defence ministry-i bo, iba missile ya Russia nungi kilometre 500 bilar ang tsük aser Russia nem kicha timtem magütsür, ta ashir.




Kathmandu, May 15 : Kathmandu, Nepal nung municipal election 2017 May 14 nung agir election commission ketdangsertemi May 15 nung vote azüngba mapang tangokba noksa nung angur.

OFFICE OF THE TAMAJANG KIDONG, CHANGTONGYA P.O Changtongya-798613, Distt-Mokokchung, Nagaland. PELABA LEMSATEPER



Sd/- O. Tongpang Jamir Chairman, Tamajang Kidong.




Sd/- I. Yashi Jamir Secretary, Tamajang Kidong.

Iba osang kaket ajanga item adianutemi mapa tajung ngua kidong nem khonang nüngsang bener arutsü nung kangasa pelaba lemsateper.

1. Rev. R. Meren Jamir, Nagaland Nagamese Baptist Church nung Executive Secretary shimba.
2. Limasena Y. Jamir D/o Rev. O. Yashi Jamir, Pastor, Süngkongmen Baptist Church. Lai NPSC ajanga tatidang agiba nungi Physics nung Asstt. Professor takok ngutet. Taküm kümsa balaka Tsüngremi kinungertem moatsüdar ni ta Pa tenüing tali asanger. Yamaji nenok ajak ano maneni Tsüngremi moajangma.

KOHIMA LONGJANGTSUR TELONGJEM TENÜNGSANG AGÜTSÜR



tenüingsang agütsür. Takok angurtem ajak tali ajemalushir Tsüngrem nungi shisatsü meshir nükjidong meraksai meranga azüngtsü ayongzükür.

Sd/- S. Akala Aier Mendenpula, KLT

Kohima Longjangtsür Telongjem-i Mr Longsener Longkumer S/o Mr Nganen Longkumer & Mrs Alemla Imsong jabaso ajanga HSLC tatidang nung Top 19th jenjang nguteta konang bener arutsü nung KLT-i pa nem tepela tenüingsang yim yim sangoktsür.

Ano kaketshirtem shirnokisa HSLC & HSSLC 2017 tatidang nung takok tajung ngutetogo, nenok ajak KLT mendenti nungi tepela

Sd/- Tekatola Tezulula, KLT

GIDEON BOYS HOSTEL

NEAR PUBLIC COMMERCE COLLEGE, RAILWAY AUTO STAND, DIMAPUR

ADMISSION CLASS 8 - 12

Lanur Missionary kati lapoka amshir

Iba Hostel nungi PCC, Pranab, Salt Christian College, CHSS aser City College tashi tetsüing agi dang senzütetsü.

CONTACT : 8575662210 / 8974443847

Office of the IMRONG YOUTH ASSOCIATION Longkhum: Nagaland TETUSHI AGÜTSÜR

Wb. Imnusashi Imchen aser Wt. Chubasangla Kichu na jala Kr. Kikanaro Imchen-i NPSC tatidang nung Post Graduate Teacher in Mathematics under Educational Department nung takok tulu ngua Imrong Youth Association nem tenüing tajung bener arutsüba asoshi I.Y.A-i tetushi agütsür. Aser HSLC & HSSLC tatidang nung I.Y.A züngsem shirnoki takok tulu nguogo, nenok ajak nem tetushi agütsür.

Sd/- Mr. Panchen Imchen President

Sd/- Miss. Anungla General Secretary

The Bethesda Prayer Centre, Dimapur would like to clarify on the latest media circulation, especially in the Whatsapp and Facebook with regard to Mr. Imlikaba Longkumer (Clark) being associated with the Prayer Centre.

It may be clarified that Mr. Imlikaba Longkumer (Clark) came and worked at the Bethesda Prayer Centre in the month of July 2016. However, due to personal reason, he left the Prayer centre in the month of Dec. 2016. Since then, Mr. Imlikaba Longkumer has disassociated from Bethesda Prayer Centre, and will not hold responsibility for any action of Mr. Imlikaba Longkumer.

Mendang Amri Director Bethesda Prayer Home

Naga yimten ...

(TAPAK 1 NUNGI...)

Yimten tebilemsü atema olemtep nung Naga nungter telungpur telok 7 shi maden, anungji India sorkar aser NSCN(IM) nati parnok denjia tesentaktep yanglutsüla. Kasa mapang nung Naga telungpur telok 7 ji külem sabang ka nung longjemer Naga yimten tebilemsü atema inyaksü ayongzüker, ta Imkong L Imchen-isa ashi.

"Naga nungtertemi asen tarutsü tia yanglutsü atema tang ajurua aliba maongka ya mesüidaksütsüla. Taruba State general election ji February 2018 tashi nung agitsü akok, anungji ibaji matongdang Naga yimten tebilemsü atema telemtetba ka agir alitsüla" ta paisa shisem.

Minister Imkong-isa ashiba agi, tanü pai jembiba onükji pa indang tebilemba dang lir aser shinga anema jembiba masü.

Higher education ...

(TAPAK 1 NUNGI...)

Eastern Nagaland nungi kaketshirtem science azüngtsü atema Department-i Science College ka lapoktsü. Iba college dang Model Degree College (Science) ta ajatsü aser Mon district kübok Wakching nung lapoktsü aser 2018-19 academic session nungi lapoktsü imlar, ta

Taruba hopta pa Punjab-i aotsü aser idakji aliba technical institutes nung Naga kaketshirtem oa azüngtsü atema osangtsüsang metetpelatsü, ta paisa shisem.

Ano külen, department-i backward areas nung bus service magütsür ta ENSCU-i ashiba atema Deo Nukhu-isa ashiba agi, "Department-i college indang bus garitem alitsü atema senotsü agütsüogo saka 'contingency basis' nung Driver aser Conductor tem anioksü tebilemba State Chief Secretary-i magizük. Iba jagi onoki bus gari magütsür."

Eastern Nagaland nung tesayur kati dang college department balala repringer ta osangkakettem adokbaji tiyazü lir, ta Deo Nukhu-isa ashi.

Ano, küm ka dak tema college tem nung Principal tem mapa melemzüksüsbaji senior Ph D aser non-Ph D tesayurtem tsüngda okadak ken o benokba ajanga lir. Ajisüaka, iba onük ya tekaratiba nung bentettsü, ta paisa metetdaksü.

OFFICE OF THE
LONGJANG SENSO MUNG DANG

P.O. IMPUR, B.P.O. Longjang

TENÜNGSANG AGÜTSÜR


Wb. Ngangnenchiba'er jabaso Sp. Longsener

Longkumer-i HSLC Exam 2017 nung 19buba jenjang ngutetba asoshi Longjang Senso Mungdang ajanga konang tutoshi agütsür. Maneni, HSLC & HSSLC tatidang nung takok angur kaketshir ajak nem tenüngsang agütsür.

Ano, tsünglanglen agüja aliba züngsemtemi temaba jenjang tongtetba asoshia tenüngsang agütsür.

1. Mr. Moarenba Pongen, S/o K. Imsu Pongener, promoted to Asst. Commissioner (EMF) Excise Deptt. Govt. of Nagaland.
2. Er. B. Imsümetjen, S/o Lt. Bendangsangba, promoted to Chief Engineer (ONGC) Sibsagar, Assam.
3. Mr. Imna Sashi, S/o Lt. Bendangsangba, promoted to Statistical Officer, Kohima Nagaland.

Tarutsü anogotem nunga nenoki takok angutsü asoshi onoki sarasademtsür.

(SUPONGSASHI)
Secretary(M. TEMJEN JAMIR)
PresidentOFFICE OF THE
LENGRIJAN VILLAGE COUNCIL

DIMAPUR: NAGALAND

NOTICE

13-05-2017 anogo Lengrijan lokti senden nung lemtebba ama, Lengrijan Village Council-i agüja aliba onüktem nung akangkanga anidaksü atema tetuyuba agütsür.

1. Lengrijan Village Council-i yim telongtet nung kilentzü yimdokdak mita repringtsü aser anepalutsü.
2. Lengrijan nung aliba meputem nung gari lenmang temesütem ajak tuluba küma yanglutsü. Anungji ali kiburtemi LVC den amalitepa iba mapa nung yariteptsü mepishir.
3. Ali kibur ajaki December 31, 2017 tashi nung pei yimtsüng/jila nung aliba e-roll nungi pei tenüng Lengrijan Village, Dimapur-i belena bener arutsü metetdaksür. Iba tetuyuba sülen manidaker nem Lengrijan Village Council ajanga P.R.C mesüra N.O.C magütsütsü.

Sd/-
(N.MEREN IMCHEN)
Chairman

Lengrijan Village Council

Sd/-
(ALITEMSU JAMIR)
Secretary

Lengrijan Village Council

tenüngsang agütsür

Tsüngrem temeim aser taochi tulu tena Miss Imnasenla, daughter of Mr. Watisangba aser Mrs. Taang (Longsa Village), 34th buba Discipleship Bible College Convocation, 12th May 2017, nung jala Imnasenla-i takok tulu ngua aser tsünglang len agüja aliba awards tem agizüka tenüng tajung aser konang nüngsang tulu bener arutsü nung tsürabur, kinunger aser adianutemi la nem tetushi aser tenüngsang agütsür.

Awards:

1. D. Haralu Academic Proficiency Award
2. R. A. Rikum Scripture Award

Subject Awards

1. Christian Ministry Prize
2. Religion and Society Prize
3. Old Testament Prize
4. Theology and Ethics Prize

Tulusang Tsüngremi maneni nü taküm Tsüngremer wadang asoshi amshiangma ta sarasademtsür. Tsüngremi moajang!



- Temeim tsürabur aser kinungertem.

JAWAHAR NAVODAYA VIDYALAYA, KHENSA YIMYU WARD

P.O Ongpangkong, Mokokchung District: Nagaland-798617
Phone#9435525274, 08415958270 Email: jnvmkch@gmail.com

ENTRANCE TEST FOR ADMISSION O CLASS -IX - 2017

Applications are invited from the willing eligible students for admission to class - IX against vacant seats for the session 2017-18. The admission is through all India Test to be conducted on Saturday 24th June 2017 at 10:00 am to 1:00 pm in Jawahar Navodaya Vidyalaya Mokokchung, Nagaland. Application cum prospectus can be obtained at free cost from the office of the undersigned w.e.f 17.05.2017, during office hours or from www.nvshg.org. The last date of submission of application form to this office is Monday 28th May 2017.

Sd/-
Principal
JNV Mokokchung, NagalandARISHIR TETSÜ NEM TSÜNGREM
TEMOATSÜ WALOKTSÜR

Tsüngrem akhümtsüba ajemalu jakla dener ajak den liromedema litetba Ojala

Ngangshienla (Asür Aosadang kinüngtsü), Mongsenyimti sensotsür rongnung tantsütila (Arishi kum 105) taküm tajung lia 2017 "Tetsütem Anogo" ngudaksüba temoatsü lar Chirnur, Semchisemnur aser Sosemdangsem ajak-i longjemer Yihova Tsüngrem nem tenüngsang tulu agütsür.

Arishir Tsürabur nem Arllak sangtem medem arishi talang moaja, anema aliba taküm Tsüngremi moatsütsü kinüngertem ajak tamang sarasadem.

Mokokchung Town Longsa Metsübuttsür Telongjem
TENÜNGSANG AGÜTSÜR

Tamangtir Wt. Imnatula aser Late. Süpongrepba Jamir (Longsa) tena jala Wt. Helen Jamir, la kanga tenendak aser tabensa, ajak den saku süa litetba tesayur tajung ajanga Kiphire Government College nung Principal menden tongtetba asoshi Longsa Metsübuttsür ajungai la nem tenüngsang tulu agütsür. Maneni Tsüngremi la wadang jangjangja yutetsü taküm tajung moaja aniang ta sarasademtsür.

Sd/-
Wt. Z. Alemsonglia
PresidentSd/-
Wt. Imtitula
SecretaryOffice of the
Longsa Kaketshir Telongjem

H.Q: Longsa

TENÜNGSANG ASER TETUSHI AGÜTSÜR

Wb. Aoshingang Jamir aser asür Chupanglemla na jabaso Sp. Imrongsungba-i Department of Economics, Nagaland University kübok "Social-Economic transition through Developmental Schemes in Nagaland: A Comparative study of Mokokchung, Wokha and Tuensang District" onük nung Ph.D (Doctorate of Philosophy) degree ngutetba asoshi Longsa Kaketshir Telongjem-i tetushi agütsür.

Iba den külemi ano HSLC, HSSLC aser tatidang balala nung shirnokisa takok tulu ngutetogo, nenok ajak nem Longsa Kaketshir Telongjem ajanga tenüngsang aser tetushi agütsür.

Sd/-
Talirenba
PresidentSd/-
Chubanenla
Gen. SecretaryOffice of the
Mongsenyimti Village Council

Rionsanger Putu

P.O. Chuchuyimlang, Dist: Mokokchung, Nagaland-798614

SANGDONGER

Mongsenyimti yim ya yimchen ali nungi alua aküm. Saka Mrs. Meyisongla Retd. Dy. Director Nursing Kohima lai Tir Yimiyim Adok- 201, Vol- XIV Dated: 11 May 2017 Olemsabang nung Mopungchuket yimtiba nungi alua Mongsenyimti yim aküm ta osang kaketsür nung adoktsüba atema Mongsenyimti Rionsanger Putu Menden-i la aija 15th May 2017 anogo nung Sobaliba dak aketba ama la dang Ak ka senchi chiogo ta sangdonger.

Sd/-
Imnakumzuk Ozukum
ChairmanSd/-
N. Chizung Ozukum
AolaOffice of the
Yimjenkimong Sensotsür Telongjem

Mokokchung Town - 798601

TENÜNGSANG ASER TETUSHI AGÜTSÜR

Yimjenkimong Sensotsür Telongjem Mokokchung Town (YSTMT) ajang teküboklen agüja aliba Tenyim aser takok balala angur nem khonang aser tetushi agütsür.

1. Wt. Nungshienla (D/o Mr. & Mrs. Lulenliba Lemtor) Ao Senden Literature Board-i acha-ayanga agiba Arangtet tatidang nung post Graduate Diploma-2016 nung tematiba jenjang nguteta Jemtimenba Mollier Foundation senpet (Award) ajangzüktetba.
2. Wb. Meyalepden (S/o. Matangluen Tzüdir) kasa Ao Senden Literature Board-i achaayanga agiba Arangtet Tatidang BA Diploma - 2014 nung tematiba jenjang nguteta Jemtimenba Mollier Foundation senpet (award) ajangzüktet.
3. Wt. Tzüknungchila (D/o Mr. & Mrs. Pangertoba Ozüküm) Clark Theological College BD - 2017 nungi Late Rev. Dr. I. Ben Wati 'Christian Ministry Award' aser Scripture Knowledge nung marks teimtiba (Merit) ngua tematiba senpet ajangzüktetbatem asoshi khonang tetushi agütsür.

Item den 207 HSSLC aser HSLC nung kaketshir shirnokisa jenjang balala nung takok tajung nguogo, nenok ajak nem YSTM ajanga kasa khonang tetushi agütsüba sangdonger.

Sd/-
I.Asangla Ozüküm
PresidentSd/-
Akuminla
Secretary

Angelique Kerber WTA Ranking mezüngbuba jenjang nung lir



Paris, May 15 (Agencies): Hombarnü WTA ranking adoktsüba nung Serena Williams ajateta Angelique Kerber mezüngbuba jenjang nung lir.

Kerber-i taoba hopta Madrid open nung kanga junga asayaba ajanga lai mezüngbuba jenjang

tongtetogo. German tsürla ya Madrid open tasembuba round nung Eugenie Bouchard den asaya, saka teberem iruba ajanga asaya tatembang tashi masayateti tugoadok.

WTA ranking yamai alitsü"
1. Angelique Kerber (GER) 7.035

- pts (+1)
- 2. Serena Williams (USA) 6.110 (-1)
- 3. Karolina Pliskova (CZE) 6.010
- 4. Simona Halep (ROM) 5.205 (+4)
- 5. Dominika Cibulkova (SVK) 4.480
- 6. Johanna Konta (GBR) 4.330
- 7. Garbine Muguruza (ESP) 4.287 (-3)
- 8. Svetlana Kuznetsova (RUS) 4.260 (+1)
- 9. Agnieszka Radwanska (POL) 4.195 (-2)
- 10. Caroline Wozniacki (DEN) 3.915 (+1)
- 11. Elina Svitolina (UKR) 3.780 (-1)
- 12. Venus Williams (USA) 3.752
- 13. Madison Keys (USA) 3.162
- 14. Kristina Mladenovic (FRA) 2.965 (+3)
- 15. Elena Vesnina (RUS) 2.875 (-1)
- 16. Petra Kvitova (CZE) 2.780 (-1)
- 17. Anastasia Pavlyuchenkova (RUS) 2.590 (-1)
- 18. Anastasija Sevastova (LAT) 2.135 (+4)
- 19. Coco Vandeweghe (USA) 2.082 (+1)
- 20. Kiki Bertens (NED) 2.064 (-1).

FIFAU-17:1911 Bagan Captain'er semchir nem Puyol-i mezüng ticket agütsü

New Delhi, May 15 (Agencies): FIFA U-17 World Cup 2017 atema local organising committee ajanga ticket ayokba sentong tenzükbä mapang Spain nunger football asayar mongin, Carles Puyol-i shilem agiba ajanga nüburtem puadaksü.

Sorkar indang Mission XI Million sentong nung sendaktepa alir tanurtem den külemi sports minister, Vijay Goel aser par cabinet teloktem den taoba Barcelona central defender, Puyol ya 'friendly match' ka asaya.

India nunger football asayar teloki otsü yangluba bilemteta linük nung FIFA asayamong atema ticket ayokba ya Mongulbarnü 19:11 ako nungi tenzüksü.

1911 küm ya mezüngbuba India nunger football asayar telok, Mohun Bagan FC-i England nunger East Yorkshire Regiment madak takok ngua IFA Shield ya angu.

Mohun Bagan FC indang captain, Shivdas Bahaduri'er semchir Gauri Bahaduri nem mezüngbuba ticket ya Puyol-i agütsü.

October nung iba asayamong nung arua shilem agitsü tejangraba olen ka Puyol-i ashi.

"Iba linük semdangtsü kü indang tejangraba aser yongyaa



Carles Puyol FIFA U-17 World Cup ticket ayoktsü tenzüksüba sentong nung adendang tangokba noksa nung angur.

liasü aser tetsü tebu mapang nungi sobaliba talubusa bener aruba ngua ni kanga pelar," ta Puyol-i ashi.

"India nungertemi World Cup asayaba angutsü aser ibai television nung anguba dang nungi khenyongi balaka lir. Nenoki tashi balaka aruba metettsü," ta Puyol-isa ashi.

"FIFA U-17 World Cup nung ya tarutsü nung nungtugu akümtsüpurtem asayatsü. Anungji iba maangka agia nüburtem ajunga arua

reprangtsüla," ta paisa ashi.

"Iba asayamong reprangtsü asoshi ticket jenjang akok tashi tajemba nung latetogo, sen 50 dang tajemba agi World Cup ticket alitettsü. Anungji nüburtemi iba asayamong mereprangtsü kuli kicha mali," ta Union sports minister, Goel-i ashi.

"Iba asayamong ya tatembang kati arudaktsütsü masü saka iba ajanga India nung football asayaba nung temelenshi tulu tenzükdaktsütsü," ta Minister-isa shisem.

Misbah & Younis na cricket asaya nungi anenogo

New Delhi, May 15 (Agencies): Pakistan nunger cricket asayar mongin Misbah-ul-Haq aser Younis Khan na Deobarnü international cricket asaya nungi anenogo.

Pakistan-i Caribbean Island nung mezüngbuba Test series 2-1 agi akokba sülen dena cricket asaya nungi anen.

Arishi küm 42 tain Misbah-i pa cricket asayaa aruba tepeyong nung test asaya 75 nung run 5,222 yanglu aser iba nung century 10 aser half-century 39 densema lir. Pai ano ODI 162 asayaba nung run 5,122

as er half-century 42 yanglu.

Maneni arishi küm 39 tain Younis Khan-i test asaya 118 nung run 10,099 yanglu koba nung century 34 aser half century 33 densema lir. ODI nung pai run ajak senteper 7,249 yanglu.

Alima ajunga nungi cricket asayartemi Twitter ajanga dena tenüng sanga liasü.

Taoba mapang England nungi asayar Kevin Pietersen-i video ka nung dena ya cricket asayar aser nisung tajung lir ta ashi.

Taoba mapang India nungi cricket asayar Sanjay Manjrekar-i yamai zülutsü: "

Batsman kanga dang tajung aser Ajaki sapuba nisung ana. Misbah & Younis na dang kanga pelar. Nüna mapa tajung ajaki menongraa bilemtetsü."

Wasim Akram-i ashiba agi, Misbah-ul-Haq-i anishiba yimya ya pai meteta aliba captaincy yimya dang nungi kenyongi balaka saka kanga dang tetangshi liasü.

"Pa asaya tenzükbä anogo nungi tejangraba balaka liasü anungji pai Pakistan atema run paika yangluba ya taoksatsüka masü," ta Younis indang jembidang Akram-i ashi.

MAY 16, 2018 ASAYA
-----QUALIFIER 1-----
Mumbai VS Pune - 8:00 PM

2017 Cricket World Cup India tsür asayartem sangdongogo

Mumbai, May 15 tanabuba jenjang nguteta lir.

(Agencies): Board of Control for Cricket in India (BCCI)-i Hombarnü 11buba ICC Women's World Cup June 24 nung July 23 tashi asayatsü aliba nung shilem agitsü asoshi asayartem tenüng sangdongogo.

India tsür rongnungi asayar tejen Mithali Raj lenisüba kübok Britain nung asayar telok 8 tetoktepba nung shilem agitsü.

Tang tashi nung India tsürtemi iba trophy khendanga koka mali. Parnoki Australia nung 2005 küm asayadang

- 1. Mithali Raj (Captain)
- 2. Harmanpreet Kaur
- 3. Veda Krishnamurthy
- 4. Mona Meshram
- 5. Punam Raut
- 6. Deepti Sharma
- 7. Jhulan Goswami
- 8. Shikha Pandey
- 9. Ekta Bisht
- 10. Sushma Verma
- 11. Mansi Joshi
- 12. Rajeshwari Gayakwad
- 13. Poonam Yadav
- 14. Nuzhat Parveen
- 15. Smriti Mandhana.

ATP Ranking nung Nadal jenjang 4-i tuogo

Paris, May 15 (Agencies): Madrid Masters nung Rafael Nadal-i takok anguba sülen Hombarnü ATP jenjang sayaba nung Nadal jenjang ka ajungketa pezübuba jenjang nung lir.

Spain nunger Nadal-i Madrid Masters final Deobarnü asayaba nung Dominic Thiem madak 7-6 (10/8), 6-4 agi takok angu.

Tang tesüsa sayaba ATP jenjang nung Borna Coric ya jenjang 41 nungi 18buba tongtetogo.

ATP temaba jenjang 20 nung alirtem yamai lir:

- 1. Andy Murray (GBR) 10.360 pts
- 2. Novak Djokovic (SRB) 6.845
- 3. Stan Wawrinka (SUI) 5.605
- 4. Rafael Nadal (ESP) 5.195 (+1)
- 5. Roger Federer (SUI) 5.035 (-1)
- 6. Milos Raonic (CAN) 4.180
- 7. Dominic Thiem (AUT) 4.035 (+2)
- 8. Marin Cilic (CRO) 3.735 (-1)
- 9. Kei Nishikori (JPN) 3.470 (-1)
- 10. David Goffin (BEL) 3.055
- 11. Grigor Dimitrov (BUL) 2.900 (+1)
- 12. Jo-Wilfried Tsonga (FRA) 2.870 (-1)
- 13. Tomas Berdych (CZE) 2.690 (+1)
- 14. Jack Sock (USA) 2.370 (+1)
- 15. Gal Monfils (FRA) 2.635 (+1)
- 16. Lucas Pouille (FRA) 2.330 (-3)
- 17. Alexander Zverev (GER) 2.300 (+2)
- 18. Nick Kyrgios (AUS) 2.155 (+2)
- 19. Albert Ramos (ESP) 2.145 (-2)
- 20. Roberto Bautista (ESP) 2.110 (+1)

Tanurbo tanur dang !
Yimtung nung ayokba
chiyongtsütem achitsübasä !
Tetsü shia teinyaktsü timji.
Tanur temang anepalua
anema lidaktsütsübasäji lir

LIVSAV FOR KIDS

NEW PACK

Combinative Appetite Enhancer

Manufactured by Medhanta Essences Health Products Pvt. Ltd, Thane (Maharashtra), CUSTOMER CARE: 022-64881132

BIEMDANGANG
"Mapa tilatiba asoshia nü molungjang, tekolok aser tanüla agüjang. Ibaji takoker indang miim tasa lir."